

崇雅堂書錄

崇雅堂書錄序

余觀藥樵自序其書錄知其先得書綦難讀書良苦率與余同獨其後則豐歉特異蓋良書盈篋之樂其聚散悉隨人生之遭遇不盡關於嗜好歐公物集所好猶是得半之說也藥樵自通籍後未久卽出爲黑龍江財政監理官其後忽值國變當道要其以方面領行省財賦或筦徵榷是時銳然思有建樹所至持躬廉靖化私爲公一洗腥羶流毒先後規畫力行者九閱寒暑孤行己意強立以收葵財之效略近劉士安要其官俸所入較彼歲歲株守研席者相去終自天淵而君起自寒素深諳營殖廉泉之潤綜覈有法不期腴而自優厚擅此兩

端由是銳意收括書籍之願悉藉以償若余則光宣間雖亦入都脩書校書於曹司班行中或授書於學校裁閱五稔月給請受祇符三百六旬之數在余則爲最優裕之時是時兄弟義居子姓林立方相與圖生計之不匱悉所有以贍家雖居鄰廠肆者三年日走屠門一鬻未以入口山齋所蓄猶是前此與君同時課文得錢所購之書其竟較君前後所有祇三分之一而強且君生平所得雖鈔宋槧元鈔而縹帙必精排比必整余則但求有字而值廉他更不敢計然則此一事余之遜藥樵不可以道里計其故則由兩人中年以後所遭之殊而治生優絀尤霄壤非余之嗜書遽遜藥樵也而尤有異

者藥樵少壯辛苦所得之書藏之家者悉爲洪水收去  
今所存者皆應官中外所得余則少壯時辛苦所得亦  
藏之家雖中經匪燹燼其秘惜十之一二而通常之本  
則八九均爲里人救出其所存皆三十年以前兄弟節  
縮所得然則天之於余嗇其力使畢生無充裕之境以  
恣收書一日之樂於藥樵則獨有遭遇以償其大願似  
天於君獨厚矣乃其卒也仍俾余留此戔戔辛苦之物  
供其垂老之娛於藥樵則僅留其後來恣意所得者以  
慰之此中一予一奪情事自殊而造物固不肯予人以  
完美必使各留缺陷又恰相等宜藥樵不鄙予小巫之  
陋必使之叙此錄之由然卒何以掩予小巫見大巫之

言金三  
一  
恥也耶蓋藥樵之舊藏雖斂於水其後之所有猶超余而上之溢其半數固宜爲書錄以示後供癖書者之考校吾尤喜其此舉不蹈吾鄉先輩平安館觀海堂與蘄水王氏武昌柯氏書散而目亦亡之慨歎尤可開創吾鄉方來收藏之風尙其益甚大若余所收雖經亡兒夔強一再簿錄終付塵封亦以此非適意之遭姑留以待可耳今年夏秋君促余賚湖北文徵來舊都相與葺事余又以蒐求方志缺佚觀書此間因獲半載之聚首恰與君槩行此錄相值故不辭而書此以歸之乙亥秋仲

羅田王葆心

崇雅堂書錄序例

予自幼別無嗜好惟好書朝斯夕斯非書莫適也得南  
皮師書日答問讀之始知求書顧家貧不可必得每閱  
市輒流連不忍去聞人有祕籍必展轉假鈔刻期歸還  
無爽以爲常猶記少時有以史記求售者直僅二緡囊  
中空無有謀之先太夫人以衣物付質庫乃得之其艱  
如此自後負笈武昌肄業菱湖從先師譚復堂鄧葆之  
梁節盦諸先生游多見賢豪長者始稍識問學塗轍插  
架所有不過羣經通鑑史漢而已四部要籍苦未周備  
欲參攷而無從也意頗恨之先君子不謂然徐曰學固

貴博尤貴知要豈必待插架三萬而後議讀耶何如姑  
盡所有再謀其他予爲悚然自是專致力於經史義理  
詞章之學無暇旁鶩矣如是者有年然而嗜書之癖莫  
能改也凡足以輔德業資治理廣知識備參攷者必審  
其緩急後先次第搜集之起戊子迄壬寅凡十有五年  
計得書十萬卷藏諸潛江將廬自癸卯通籍迄丁巳歸  
田凡十有五年又積書二十萬卷藏諸北平息園蓋四  
部要籍略備於是矣迴憶生平理財黑吉權稅邊關于  
役并門前後纔九年耳此九年以外皆我讀書之日以  
書求己以書養心處境之困以書慰窮愁拂逆之來以

書祛煩惱恨古人之不可作也以書爲師友欲周覽四海九州之大也以書當臥遊守官以書經世務垂老以書娛暮年蓋終其身不廢書冊無一日不與書爲緣焉書乎書乎其能世世守之久而不散矣乎殆不可必也黃梨洲有言藏書難藏之久而不散則尤難予每誦其言而悲之古今書籍之厄蓋悉數之而不能終矣但就予所知者言之歸安陸氏酌宋樓聊城楊氏海源閣藏弄至有名一流入東瀛一爲駐軍席捲而去常熟瞿氏錢唐丁氏亦藏書家表表者聞其後人亦不能守也潘吳縣翁常熟兩相國王廉生盛伯羲兩祭酒在光緒初



亦侈談收藏身後楹書皆散如雲煙不可問江陰繆篋  
珊武昌柯遜庵長沙葉煥彬皆富藏書身沒以後散落  
廠肆殆盡矣宜都楊惺吾藏宋元本極多其後人以七  
萬元屬之他氏矣黃岡王洪甫漢陽周退舟江甯鄧孝  
先所藏頗不寂寞乃及身而售之黃陂陳士可精于鑒  
別頗多海內孤本其後人以賤價售之廠估並不問篋  
內何書也然則梨洲所云久而不散之難豈不信然也  
耶陸楊瞿丁繆葉鄧七家尙有書目流傳其餘諸家別  
無紀載以表見於世眞憾事矣予爲此懼懼書籍之不  
能久聚也因思寫定目錄遂按四部分類編成十五卷

明知異本無多不足稱收藏然有此一書未散以前可  
以備繙檢既散以後亦可作前塵夢影之留藝風藏書  
記自序云異日書去而目或存掛一名於藝文志庶不  
負好書若渴之苦心區區微旨亦若是焉己爾壬戌春  
三月息園居士甘鵬雲書時年六十有一

是編既寫定未及付手民恐續有所得便增入耳癸亥  
秋忽得潛陽潰隄之信漢水灌潛城將廬藏書十萬卷  
盡付洪流矣惜哉惜哉此十萬卷者皆予儲積賣文錢  
節衣縮食所聚與有力購致者不同可惜一也其中有  
先君子編輯及手鈔點治之書可惜二也有鄉先生著

述孤本僅存之書可惜三也有予手鈔手校之書可惜  
四也予有俚句云潛陽老屋小如舟石墨盈車書汗牛  
可惜無人勤守護金隄一決付洪流詠此事也已矣已  
矣莫如何矣昔人有書爲造物所忌之說予頗不然之  
今不幸於吾身親遇之矣異哉歸震川之言也書之所  
聚有如金寶之氣卿雲輪困覆護其上嗚乎其信然耶  
抑強作快心之論耶不然胡自辛亥以來書籍之厄於  
兵燹水火者屢見不一見也將廬之書亡矣息園之二  
十萬卷其能長爲我所有耶抑否耶聊存書目一編等  
諸過雁留影而已甲戌冬潛廬老人甘鵬雲書時年七

十有三

編纂此書初仿孫祠書目之例分爲十二類友人規余曰自荀勗李充以來區分四部綜括羣書相沿已久無庸更張爲也予深韙之故仍以四部分類編次之法大率以四庫總目爲藍本然有不概於心者亦不苟同也經之類十有三曰易類曰書類曰詩類曰禮類曰樂類曰春秋類曰四書類曰孝經類曰爾雅類曰石經類曰羣經總義類曰小學類曰緯候類

易教廣大無所不包漢儒言象數京焦談襍祥王韓祖尙虛無陳邵務窮造化胡瑗程子闡明儒理李光楊萬

里參證史事其流夥矣今第依撰人時代叙次爲一類不復區別條流四庫總目之例也

書有今古文之別而古文與孔傳之真僞尤滋聚訟彼亦一是非此亦一是非讀者當自得之不欲爲左右袒也今第依撰人時代錄之

詩有齊魯韓毛四家齊魯韓三家均亡存於今者獨毛詩而已三家但有清人輯本無全帙也今分錄之爲毛詩之屬爲三家詩之屬

周禮儀禮禮記舊稱三禮今仍分錄之三禮外增大戴禮之屬其通考三禮者爲三禮總義之屬別考五禮者

爲禮書之屬

樂之亡久矣唐以來志目或以樂伎雜廁其間非也今錄其有關雅樂及考訂律呂者次爲一類

春秋三傳四庫未分別著錄今遵書目答問之例分錄之爲春秋左傳之屬爲春秋公羊傳之屬爲春秋穀梁傳之屬爲春秋總義之屬

論語漢志入六藝而以孟子入儒家大學中庸在小戴記合爲四子書自宋儒始四庫總目有四書一類今仍之分爲四種曰論語之屬曰孟子之屬曰大學中庸之屬曰四書總義之屬

孝經爾雅漢志列爲一家爾雅爲十三經之一其來久矣四庫乃以爾雅列入小學非也今從漢志而小變其例分孝經爾雅爲二類不令與小學混同

隋志以石經入小學張文襄公云石經乃經文本原應別爲類長沙葉煥彬云開成石刻乾隆監本煌煌巨製不得以小學目之且近儒或校文字或叙廢興箸述衆多非別立一類不能統括羣書予深然之今從其說序次石經爲一類

仿四庫之例列羣經總義一類子目五爲古注之屬爲說解之屬爲記載目錄之屬爲文字之屬爲音義之屬

漢志及四庫目錄均有小學類今從之說文形聲義三者兼備故叙列小學類之首餘則爲訓詁之屬爲字書之屬爲韻書之屬而以雜體書終之千文蒙求以教學僮亦漢志列弟子職急就章之例也

緯候爲東漢經學之別子四庫以易緯附於易類孫穀古微書附於五經總義均覺未安惟長沙葉氏書目別爲一類今從之

史之類十有五曰正史類曰編年類曰紀事本末類曰古史類曰別史類曰雜史類曰傳記類曰史鈔類曰載記類曰政書類曰地理類曰譜牒類曰目錄類曰金石



類曰史評類

正史者正統之史也叙列正史專書外而以音注訂補考證之屬及年表元號之屬附之

四庫有編年紀事本末兩類編年源於春秋者也資治通鑑朱子綱目爲大宗故別爲三種曰通鑑之屬曰綱目之屬曰別本紀年之屬紀事本末源於尙書者也爲編年之變例以踵事者多故另爲類焉

四庫無古史一類書目答問有之其說云古無史例故周秦傳記體例與經子史相出入散歸史部派別過繁應彙聚一所爲古史其說至確今從之